

四庫全書

集部

欽定四庫全書

集部

全蜀藝文志卷三至五

詳校官內閣中書_臣李采

侍讀_臣孫球覆勘

總校官進士_臣繆琪

校對官中書_臣李荃

謄錄監生_臣王焜

欽定四庫全書

全蜀藝文志卷三

明 周復俊 編

詩

文王之化行乎江漢之域江有沱詠于二南之先徵
之禹貢則岷山導江江別為沱蜀人凡水皆稱江江
之漫流皆稱沱至今猶然原夫媵女之見不出闕觀
此詩之興即見而起未有身在岐山而遠取江沱家
奠鄭鄠而遙詠岷蜀者也是江沱之篇為蜀詩之首

無疑也豈獨東明史邪之名見于揚雄之紀中和樂職之詩始于王褒之作乎今志所取凡緣蜀而作者載之其人為蜀產而詩僅存一二者亦載焉其類十有九於類之中又有類焉其人則以世之先後為序當軸時棟表儀里門者咸不敢載以附海虞吳先生文章辨體之例

風謠

蠶叢國詩四章

漢古辭

川崖惟平其稼多黍旨酒嘉穀可以養父野維阜丘彼稷多有嘉穀旨酒可以養母

惟月孟春獮祭彼涯永言孝思享祀孔嘉彼黍既潔彼儀惟澤蒸命良辰祖考來格

日月明明亦惟其夕誰能長生不朽難獲
惟德實實富貴何常我思古人令聞令望

譙君黃頌

漢無名氏

譙君黃仕成哀之世為諫議大夫數進忠言後違避

王莽又不事公孫述怒遣使齎藥酒以懼之君黃
歎曰吾不省藥乎其子瑛納錢八百萬得免國人作
詩曰

肅肅清節士執德實固貞違惡以授命沒世遺令聲

大度停民謠

出益部耆舊傳王愬事見漢書

信哉少林世為遇飛被走馬與鬼語

陳紀山頌

巴郡陳紀山為漢司隸校尉嚴明正直西虜獻眩王

庭試之分公卿以為嬉紀山獨不視京師稱之巴人
歌曰

築室載直梁國人以貞真邪娛不揚目枉行不動身奸
軌僻乎遠理義協乎民

嚴王思頌

漢應季先

巴郡嚴王思為揚州刺史惠愛在民每當遷官士民
塞路攀轅詔遂留之居官十八年卒百姓若喪考妣
義送者齎錢百萬欲以贍王思家其子徐州刺史不

受送吏義崇不忍持還乃散以為食食行客巴郡太守汝南應季先善而美之乃作詩曰

乘彼西漢潭潭其淵君子愷悌作民二親沒世遺愛式鏡後人

柳琮歌

益部耆舊傳云柳琮字伯騫蜀人為治中其所拔進皆世所稱鄉里為之語曰

得黃金一筍不如為柳伯騫所識

豐年歌

漢永建中泰山英資元約為郡守屢獲豐年民歌之
曰

習習晨風動澍雨潤禾苗我后恤時務我民以優饒

益部語

任文公閬中人善天文益部語曰

任文公智無雙

益部謠

賊來尚可尹來殺我

樊守歌

益部耆舊傳

漢樊智遷為蜀郡太守秩滿民歌之曰

樊守來門夜開持節去憂惶懼

去思歌

吳資遷去民人思慕又歌之曰

望遠忽不見惆悵當徘徊恩澤實難忘悠悠心永懷

灌令歌

鍾嶸良吏傳

瞿瑗為灌令開溝圳田民賴其利歌曰

天降神明君錫我慈仁父臨民布德澤恩惠施以序穿
溝廣溉灌決渠作甘雨

刺李盛謠

孝桓帝時河南李盛仲和為郡守貪財重賦國人刺
之曰

狗吠何諠諠有吏來在門披衣出門應府記欲得錢語
窮乞請期吏怒反見尤旋步顧家中家中無可與思

往從鄰貸鄰人以言遺錢錢何難得令我獨憔悴

巴郡謠

漢安帝時巴郡太守連失道國人風之曰

明明上天下土是觀帝選元后求定民安孰不可念禍
福由人願君奉詔惟德是親

思治詩

漢末政衰牧守自擅民人思治作詩曰

混混濁沼魚習習激清流溫溫亂國民業業仰有修

李都護歌

江表傳

李嚴為都護用法深刻人歌之曰

難可狎李鱗甲

三節婦歌

永初中廣漢漢中羌反虐及巴郡有馬妙祈妻義王元
憤妻姬趙蔓君妻華夙喪夫執共姜之節守一醮之
禮號曰三貞遭亂兵迫匿懼見拘辱三人同時自沉
于西漢水而死有黃鳥鳴其亡處徘徊焉國人傷

之乃作詩曰

闕闕黃鳥爰集於樹窈窕淑女是繡是黼惟彼繡黼其
心匪石嗟爾臨川邈不可獲

王稚子歌

漢古辭

孝和帝在時洛陽令王君本自益州廣漢蜀人少行宦
學通五經論明知法令歷代衣冠從溫補洛陽令化行
致賢外行猛政內懷慈仁移惡子姓名五篇著里端無
妄發賦念在理冤清身苦體宿夜勞勤化有能名遠近

所聞天年不遂早就奄昏為君作祠安陽亭西欲令後
代莫不稱傳

河內謠

王渙為河內令商賈露宿人開門卧民歌之曰

王稚子代未有平徭役百姓喜

淫豫歌

樂府

李膺益州記云灩澦堆夏水漲沒數十丈其狀如馬
舟人不敢進故曰灩澦又曰猶豫言舟子取途不決

水脉故猶豫也樂府作淫豫歌坤元錄作允豫

淫豫大如襍瞿塘不可觸

南史

李白詩五月不可淫
觸猿聲天上哀

豫大如馬瞿塘不可下

樂府

淫豫大如鼉瞿塘行舟絕

淫豫大如龜瞿塘不可窺

類要

灩澦歌

水經注

灘頭白渚堅相持倏忽淪沒別無期

附灩澦歌

灩澦大如馬瞿塘不可下金沙浮轉多桂浦忌經過

鄭樵

云天下水之險者惟蜀中之瞿塘及廣西之桂浦為最甚此歌辭所言行瞿塘者准灩澦也行桂浦者准金沙也

灩澦歌

孝子傳庾子興扶父柩過瞿塘六月水泛子興禱而遂平既過泛溢如人歌之曰

灩與如牛本不通瞿塘水退為庾公

龍床灘謠

圖經

龍床如拭濟舟必吉龍床彷彿濟舟必沒

峽中行者歌

宜都山川記云峽中猿鳴至清山谷傳響泠泠不絕
行者歌之

巴東三峽巫峽長猿鳴三聲淚沾裳巴東三峽猿鳴悲

猿鳴三聲淚沾衣

杜子美詩聽猿
實下三聲淚

黃牛歌

朝見黃牛暮見黃牛三朝三暮黃牛如故

附李白詩

巫峽夾青天巴水流若茲巴水行可盡青天無到時三
朝見黃牛三暮行太遲三朝又三暮不覺髻成絲

撥穀歌

唐李白

白帝城邊足風波瞿塘五月誰敢過荊州麥熟鰲成蛾
縹絲憶君頭緒多撥穀飛鳴柰若何

太白此詩有樂府
意故附之風謠之

後

先民謠

秦宓傳引

岷阜之山江出其腹帝以會昌神以建福

大饑不饑蜀有蹲鴟太旱不亂蜀有廣漢

此四句見古碑

廉叔度歌

後漢書曰廉范字叔度建初中為蜀郡太守成都民
物豐衍邑宇逼側舊制禁民夜作以防火災而更相
隱蔽燒者日屬范乃毀削先令但嚴使儲水而已百
姓為便乃歌之曰

廉叔度來何暮不禁火民安作平生無襦今五袴

後漢時蜀中童謠

後漢書五行志曰世祖建武六年蜀中童謠是時公
孫述僭號于蜀時人竊言王莽稱黃述欲繼之故稱
白五銖漢家貨明當復也述遂誅滅

黃牛白腹五銖當復

晉太康末蜀中童謠

江橋頭闕下市成都北門十八字

其後有李特
割據之應

唐咸通末成都童謠

新唐書五行志曰咸通十四年成都有童謠是歲歲

陰在巳明年在午巳蛇也午馬也

咸通癸巳出無所之蛇去馬來道路稍開頭無片瓦地
有殘灰

梁太祖時蜀中謠

五代史曰劉知俊初事梁太祖後奔蜀王建雖加寵
待然亦忌之常謂近侍曰劉知俊非爾輩能駕馭不
如早為之所有嫉之者於里巷間作此謠知俊色黥
丑生機繩者王氏子孫皆以宗承為名故以此猜疑

之遂見殺于成都

黑牛在園機繩斷

無題

五五復五五五五逾重數浮世若浮雲真石一如故與
君相見時杳杳非今土

右詩見于羅城北門壞碑上有乾符三年高駢名
銜餘字斷缺莫知其為何詩也辭隱義闕故附見
民謠之末

鬻官謠蜀持机

韓昭為王蜀偽相鬻官如市時有謠云

嘉眉邛蜀侍郎骨月導江青城侍郎親情果閬二州侍郎自留巴蓬涪壁侍郎不惜

張王二公歌

宋朝類苑張詠王晦叔

蜀守之良先張後王惠我赤子俾無流亡

又

彥博輸田況程戡勝蔣堂

成都謠頌

弘治初洪鍾屈銳為按察使折獄明敏犴無留繫民
歌之曰

洪不支鍋屈不解擔

土軍謠

正德初流賊倡亂取土官領兵所過殘虐十倍于賊
巡按御史王綸舉奏去之其謠曰

流賊來梳梳我土軍來篋篋我

全蜀藝文志卷三

欽定四庫全書

全蜀藝文志卷四

明 周復俊 編

楚辭

九懷

漢王褒

九懷者諫議大夫王褒之所作也懷者思也言屈原雖見放逐猶思念其君憂國傾危而不能忘也褒讀屈原之文嘉其溫雅藻采敷衍執握金玉委之污瀆遭世溷濁莫之能識退而愍之故作九懷以裨其詞史官錄第

遂列于篇

極運兮不中來將屈兮困窮余深愁兮慘怛願一列兮
無從乘日月兮上征顧遊心兮鄙艷彌覽兮九隅彷徨
兮蘭宮芷閭兮葯房奮搖兮衆芳茵閣兮蕙樓觀道兮
從橫寶金兮委積美玉兮盈堂桂水兮潺湲揚流兮洋
洋著蔡兮踊躍孔鶴兮回翔撫檻兮遠望念君兮不忘
怫鬱兮莫陳永懷兮內傷

匡機

天門兮地戶孰由兮賢者無正兮溷廁懷德兮何覩假寐兮愍斯誰可與兮寤語痛鳳兮遠遊畜鵠兮近處鯨鱣兮幽潜從蝦兮遊睹乘虬兮登陽載象兮上行朝發兮葱嶺夕至兮明光北飲兮飛泉南采兮芝英宣遊兮列宿順極兮彷徨紅采兮騁衣翠縹兮為裳舒佩兮綈纒竦余劒兮干將騰蛇兮後從飛駟兮步旁微觀兮玄圃覽察兮瑤光啓匱兮探英悲命兮相當紉蕙兮永詞將離兮所思浮雲兮容與道余兮何之遠望兮阡眠聞

雷兮闐闐陰夏兮感余惆悵兮自憐

通峰

林不容兮鳴蜩余何留兮中州陶嘉月兮總駕寒玉英
兮自修結榮蔭兮逶迤將去烝兮遠遊徑岱土兮魏闕
歷九曲兮牽牛聊假日兮相佯遺光耀兮周流望太一
兮淹息紆余轡兮自休悒白日兮皎皎彌遠路兮悠悠
顧列宇兮縹縹觀幽雲兮陳浮鉅寶遷兮砢礧堆咸雝
兮相求決莽莽兮究志懼吾心兮憐憐步余馬兮飛柱

覽可與兮匹儔卒莫有兮繼介永余思兮怵怵

危俊

世溷兮冥昏違君兮歸真乘龍兮偃蹇高回翔兮上臻
襲英衣兮緹縞披華裳兮芳芬登羊角兮扶輿浮雲漢
兮自娛握精神兮雍容與神人兮相胥流星墜兮成雨
進隣盼兮上丘墟覽舊邦兮滄鬱余安能兮久居志懷
逝兮心慙慄紆余轡兮躊躇聞素女兮徵歌聽王后兮
吹竽魂淒愴兮感哀腸回回兮盤紆撫余佩兮續紛高

太息兮自憐使祝融兮先行令昭明兮開門馳六蛟兮
上征竦余駕兮入冥歷九州兮索合誰可與兮終生忽
反顧兮西園觀軫丘兮崎傾橫垂涕兮泣流悲余后兮
失靈

昭世

季春兮陽陽列草兮成行余悲兮蘭生委積兮從橫江
離兮遺推下夷兮擠臧伊思兮往古亦多兮遭殃伍胥
兮浮江屈子兮沈湘運余兮念茲心內兮懷傷望淮兮

沛沛濱流兮則逝榜舫兮下流東注兮磕磕蛟龍兮道
引文魚兮上瀨抽蒲兮陳坐援芙蓉兮為蓋水躍兮余
旌繼以兮微蔡雲旗兮雷驚儵忽兮容裔河伯兮開門
迎余兮歡欣顧念兮舊都懷恨兮艱難竊哀兮浮萍汎
淫兮無根

尊駕

秋風兮蕭蕭舒芳兮振條微霜兮眇眇病歿兮鳴蜩玄
鳥兮辭歸飛翔兮靈丘望谿兮滄鬱熊羆兮咆哮唐虞

兮不存何故兮久留臨淵兮汪洋顧林兮忽荒脩余兮
袿衣騎霓兮南上桑雲兮回回疊疊兮自強將息兮蘭
臯矢志兮悠悠紛蘊兮徽薰思君兮無聊身去兮意存
愴恨兮懷愁

蓄英

登九靈兮遊神靜女歌兮微晨悲皇丘兮積葛衆體錯
兮交紛貞枝抑兮枯槁枉車登兮慶雲感余志兮慘慄
心愴愴兮自憐駕玄螭兮北征邇吾路兮葱嶺連五宿

兮建旄揚氛氣兮為旌歷廣漠兮馳騫覽中國兮冥冥
玄武步兮水母與吾期兮南榮登華蓋兮乘陽聊逍遙
兮播光抽庫婁兮酌醴援匏瓜兮接糧畢休息兮遠逝
發玉軻兮西行惟時俗兮疾正弗可久兮此方寤辟標
兮永思心怫鬱兮內傷

思忠

覽杳杳兮世惟余惆悵兮何歸傷時俗兮溷亂將奮翼
兮高飛駕八龍兮連蜷建虹旌兮威夷觀中宇兮浩浩

紛翼翼兮上躋浮瀾水兮舒光淹低徊兮京汴屯余軍
兮索友覩皇公兮問師道莫貴兮歸真羨余術兮可夷
吾乃逝兮南娛道幽路兮九疑越炎火兮萬里過萬首
兮凝凝濟江海兮蟬蛻絕北梁兮永辭浮雲鬱兮晝昏
霾土忽兮塵塵息陽城兮廣廈衰色罔兮中怠意曉陽
兮燎寤乃自詠兮在茲思堯舜兮龍興幸咎繇兮獲謀
悲九州兮靡君撫軾歎兮作詩

陶壘

悲哉于嗟兮心內切磋歎冬而生兮凋彼葉柯瓦礫進
寶兮捐棄隨和鉛刀厲御兮頓棄太阿驥垂兩耳兮中
坂蹉跎蹇驢服駕兮無用日多修潔處幽兮貴寵沙崩
鳳皇不翔兮鷦鷯飛揚乘虹蜺兮載雲變化鷦鷯開
路兮後屬青蛇步驟桂林兮超驤卷阿丘陵翔舞兮谿
谷悲歌神章靈篇兮赴曲相和余私娛茲兮孰哉復加
還顧世俗兮壞敗罔羅卷佩將逝兮涕流滄沱

株昭

亂曰皇門開兮照下土株穢除兮蘭芷覩四佞放兮後
得禹聖舜攝兮昭堯緒孰能若兮願為輔

懷東坡先生詞

宋楊萬里

吹赤壁之月笛兮瞻黃州之雲堂彈湘妃之玉瑟兮織
天孫之錦裳招先生其來歸兮何必懷眉山之故鄉歷
九州而猶隘兮誕寔祝融之汪酌乳泉以當醴兮殮荔
子以為糧葺榕葉以作屋兮托枕榔之蔭以為堂驅海
濤以入硯滴兮挽南斗文星于筆鉞昌黎兮歐陽視先

生兮雁行韞不洩兮忠憤烟不揜兮文章乞鏡湖兮九
闕營菟裘兮是邦予之來兮云暮與先生兮相望視履
永兮焉在問故宮兮就荒俯仰兮永懷渺山川兮蒼蒼
祝融之汪謂南海也左傳尸諸雍氏之汪服虔
注停水曰汪楚謂之汪閩謂之洋

全蜀藝文志卷四

欽定四庫全書

全蜀藝文志卷五

明 周復俊 編

詩

都邑

蜀國弦

梁簡文帝

銅梁指斜谷劒道望中區通星上分野作國下為都雅
歌因良守妙舞自己飲陽城嬉樂盛劒騎鬱相趨五婦
行難至百兩好遊娛牲祈望帝祀酒酌蜀侯誅江妃納

重聘貞女愛將雛停弦時繫爪息吹治脣朱脫衫湔錦
浪回扇避陽烏聞君握節返賤妾下城隅

蜀道難

前人

平山七百里巴水三回曲笛聲下復高猿啼斷還續

蜀道難

梁劉孝威

玉壘高無極銅梁不可攀雙流逆熾道九坂涇陽闕鄧
侯策馬度王生飲轡還歛轡懼身尤叱馭奉王猷若恠
千金重誰為萬里侯戲馬吞珠界揚舲濯錦流沉犀厭

水怪握鏡表靈丘，禹山金碧有光輝。
遷亭車馬尚輕肥，彌想王褒擁節反。
更憶相如乘傳歸，君子雲間不嗣。
江漢英靈信已衰。

蜀道難

陳陰鏗

王尊奉漢朝，靈關不憚遙。
高岷長有雪，陰棧屢經燒。
輪摧九折路，騎阻七星橋。
蜀道難如此，功名詎可要。

蜀道難

唐張文琮

梁山鎮地險，積石阻雲端。
深谷下寥廓，層巖上鬱盤。
飛

梁架絕嶺棧道接危巒攬轡獨長息方知斯路難

蜀道難

李白

噫吁噉危乎高哉蜀道之難難于上青天蠶叢及魚鳧
開國何茫然爾來四萬八千歲不與秦塞通人煙西當
太白有鳥道可以橫絕峨眉巔地崩山摧壯士死然後
天梯石棧相鈎連上有六龍迴日之高標下有衝波逆
折之回川黃鶴之飛尚不得過猿猱欲度愁攀緣青泥
何盤盤百步九折縈崑巒捫參歷井仰脅息以手撫心

坐長歎問君西遊何當還畏途巉巖不可攀但見悲鳥
號古木雄飛呼雌遶林間又聞子規啼月落愁空山蜀
道之難難于上青天使人聽此彫朱顏連峯去天不盈
尺枯松倒挂倚絕壁飛湍瀑流爭喧飗砢崖轉石萬壑
雷其險也若此嗟爾遠道之人胡為乎來哉劒閣寧嵒
而崔嵬一夫當關萬夫莫開所守或匪人化為狼與豺
朝避猛虎夕避長蛇磨牙吮血殺人如麻錦城雖云樂
不如早還家蜀道之難難于上青天側身西望長咨嗟

龍州

前人

嵐光深院裏
傍砌水泠泠
野燕巢官舍
溪雲入古廳
日斜孤吏過
簾捲亂峰青
五色神仙尉
焚香讀道經

巴州

前人

巴水急如箭
巴船去如飛
十月二千里
郎行幾歲歸

成都

蕭邁

月曉已聞花市合
江平偏見竹簾多
好教載取芳菲樹
剩照岷天瑟瑟波

賦得蜀都

褚亮

列宿光輿井分土跨梁岷
沉犀對江浦駟馬入城闔
英圖多霸跡歷選有名臣
連騎簪纓滿含章詞賦新
得上僊槎路無待訪嚴遵

成都府

杜甫

翳翳桑榆日照我征衣裳
我行山川異忽在天一方
但逢新人民未卜見故鄉
大江東流去遊子去日長
曾城填華屋季冬樹木蒼
喧然名都會吹簫聞笙簧
信美無

與適側身望川梁鳥雀夜各歸中原杳茫茫初月出不
高衆星尚爭光自古有羈旅我何苦哀傷

上皇西巡南京十首

李白

胡塵輕拂建章臺聖主西巡蜀道來劒壁門高五千丈
石為樓閣九天開

九天開出一成都萬戶千門入畫圖草樹雲山如錦繡
秦川得及此間無

德陽春樹似新豐行入新都若舊宮柳色未饒秦地綠

花光不減上林紅

誰道君王行路難
六龍西幸萬人歡
地轉錦江成渭水
天迴玉壘作長安

萬國同風共一時
錦江何謝曲江池
石鏡更明天上月

後宮親一作新得照蛾眉

濯錦清江萬里流
雲帆龍舸下揚州
北地雖誇上林苑
南京還有散花樓

錦水東流繞錦城
星橋北挂象天星
四海比中朝聖主

峨眉山上

一作下

列仙庭

秦開蜀道置金牛
漢水元通星漢流
天子一行遺聖跡
錦城長作帝王州

水淥天青不起塵
風光和暖勝三秦
萬國煙花隨玉輦
西來添作錦江春

劒閣重關蜀北門
上皇歸馬若雲屯
少帝長安開紫極
雙懸日月照乾坤

夔州歌絕句

十首取七

杜甫

中巴之東巴東山江水開闢流其間白帝高為三峽鎮
夔州險過百牢關

白帝夔州各異城蜀江楚峽混殊名英雄割據非天意
霸王并吞在物情

赤甲白鹽俱刺天閭閻繚繞接山巔楓林橘樹丹青合
複道重樓錦繡懸

灤東灤西一萬家江南江北春冬花背飛鶴子遺瓊藥
相趁鳬雛入蔣牙

東屯稻畦一百頃北有澗水通青苗晴浴狎鷗分處處
雨隨神女下朝朝

蜀麻吳鹽自古通萬斛之舟行若風長年三老長歌裏
白晝攤錢高浪中

武侯祠堂不可忘中有松柏參天長干戈滿地客愁破
雲日如火災天涼

成都曲

張籍

錦水近西煙水綠新雨山頭荔枝熟萬里橋邊多酒家

遊人愛向誰家宿

井絡

李商隱

井絡天彭一掌中
漫誇天設劒為峰
陳圖東聚燕江石
邊柝西懸雪嶺松
堪嘆故君成杜宇
可能先主是真龍
竭來為報奸雄輩
莫向金牛訪舊蹤

中元甲子以辛丑駕幸蜀

羅隱

邪氣奔屯瑞氣移
清平過盡到艱危
縱饒犬彘迷常理
不奈豺狼幸此時
九廟有靈思李令
三川悲憶恨張儀

可憐一曲還京樂重對紅蕉教蜀兒

蜀中三首

鄭谷

馬頭春向鹿頭關遠樹平蕪一望閑雪下文君沽酒市
雲藏李白讀書山江樓酒恨黃梅後村落人歌紫芋間
堤月橋燈好時景漢庭無事不征蠻

夜多無雨曉生塵草色嵐光日日新蒙頂茶畦千點露
浣花牋紙一溪春揚雄宅在唯喬木杜甫臺荒絕舊隣
却共海棠花有約數年留滯不歸人

渚遠江清碧簾紋小桃花繞薛濤墳朱橋直指金門路
粉堞高連玉壘雲牕下斲琴翹鳳足波中濯錦散鷗羣
子規夜夜啼巴樹不並吳鄉楚國聞

錦城曲

溫庭筠

蜀山攢黛留時雪簪笋歲芽縈九折江風吹巧剪霞綃
花上千秋杜鵑血杜鵑飛入巖下叢夜叫思歸山月中
巴水漾情情不盡文君織得春機紅怨魄未歸芳草死
江頭學種相思子樹成寄與望鄉人白帝荒城五千

里

新都行

歐陽詹

縹緲空中絲蒙籠道傍樹翻茲葉間吹惹彼花上露悠
揚絲意去葍弱花枝住何計脫纏綿天長春日暮

益昌行

并序

前人

貞元年中天子以工部郎中興元少尹吳興陸公長
源牧利州其為政五年予旅遊由于利觀人安俗阜
欽所以美作詩一章利州故益昌郡也目曰益昌行

詩曰

驅馬至益昌倍驚風俗和耕夫壟上謠負者途中歌處
處川復原重重山與河人煙遍餘田時稼無閒坡間業
一何脩太守德化加問身一何安太守恩懷多賢哉我
太守在古無以過愛人甚愛子理邦如理家雲雷既奮
騰草木遂萌芽乃知良二千德足為國華今時固精求
漢帝非徒嗟四氣有青春衆植佇揚葩期當說霖雨天
下同滂施

蜀國弦

李賀

楓香晚花靜錦水南山影
鷺石墜猿哀行雲愁半嶺涼
月生秋浦玉沙鱗鱗光誰家紅淚客不忍過瞿塘

蜀國偶題

錢珝

忽憶鑾輿西幸時暗傷前恨竟誰知
佩蘭應語宮臣道莫向金盤進荔枝

黔中書懷

竇羣

萬事非京國千山擁麗譙
佩刀看日曬賜馬傍江調
言

語多重譯壺觴每獨謠沿流如著翅不敢問歸橈

成都

宋楊億

五丁力盡蜀川通千古成都綠酎濃白帝倉空蛙在井
青天路險劒為峰漫傳西漢祠神馬已見南陽起卧龍
張載勒銘堪作戒莫矜函谷一丸封

前題

劉筠

鏤膚剽俗恣邊遨或得蹲鴟號富饒井絡共知天與險
螭叢無奈世興妖杜鵑積恨花如血諸葛遺靈栢半燒

才似文園何足道一生琴意祇成痼

前題

錢思公

武侯千載有餘靈盤石刀痕尚未平
巴婦自饒丹穴富漢庭還負碧砮征
雨經蜀市應和酒琴到臨邛別寄情
知有忠臣能叱馭不論雲棧更崢嶸

悼蜀詩

張詠

蜀國富且庶風俗矜浮薄奢僭極珠貝
狂佚務娛樂虹橋吐飛泉煙柳閉朱閣
燭影逐星沉歌聲和月落鬪鷄

破百萬呼盧縱大噱遊女白玉璫驕馬黃金絡酒肆夜
不扃花市春漸作禾稼暮雲連紈繡淑氣錯熙熙三十
年光景倏如昨天道本害盈侈極禍必作當時布政者
因思救民瘼不能宣淳化移風復儉約情性非方直多
為聲色著從欲竊虛譽隨俗縱貪攫蠶食生靈饑作威
恣暴虐佞罔天子聽所利唯剝削一方忿恨興千里攘
臂躍火氣烘寒空雪彩揮蓮鐔無人能却敵何暇施擊
析害物黷貨輩皆為白刃爍瓦礫積臺榭荆棘迷城郭

里第鏢苔蕪庭軒喧燕雀斗米金帛市東芻羅綺博悲
夫驕奢民不能飽葵藿朝廷僉元戎帥師盪兇惡虎旅
一以至梟巢一何弱燎毛焰晶熒破竹鋒熠燿兵驕不
可戢殺人如戲譴悼耄皆麗誅玉石何所度未能剪強
暴爭先謀剽掠良民生計空賒死心殞穫四野搆豺狼
五畝孰耕鑿出師不以律餘孽何由却俾夫熾蜂萬寡
術能籠絡邊陲未肅清胡顏食天爵世方尚奔競誰復
振蹇諤黃屋遠萬里九重高寥廓時稱多英雄才豈無

衛霍近聞命良臣拭目觀奇略

成都書事百韻詩

并序

薛田

金躔輿壤玉壘名區風物尚饒曠古稱最僕守茲職
任五年載至初則木牛流馬馳八使以均財次則皂
蓋朱幡奉一麾而作鎮歷覽勝異慷慨興懷古人曰
非感發不可以言詩非聲詩不可以導志故言成志
激流為美談偶因公退輒作成都書事七言一百韻
止陳乎益都事蹟固暇以外景加諸庶幾謬發于斐

然詎敢芳揚于作者其詩曰

混沌不變造西片物像熙熙被一川易覺錦城銷白日
難歌蜀道上青天雲敷牧野耕桑雨柳拂旗亭市井煙
院鎖玉溪留好景坊題金馬促繁絃風流鋪席堆紅豆
瀟灑門庭映碧鮮表狀屢言同穎穗敕書頻獎並生蓮
旋科杞樹炊香稻剩種晚巢沃晚田仁宅不隳由政立
義闡無取任情遷民知禮遜蠶叢後俗尚奢華遂古先
遶郭波濤來浩浩歸朝岐路去綿綿乍回黑水將成道

潛到青羊恐遇仙
靚女各功翻樣繡
袿商兼制研綾牋
爐邊泛蟻張裙幄
江上鳴鼉簇綵舩
石筍峻增衙對峙
琴臺恢闊寺相連
羣葩艷裏珍禽語
百草香中瑞獸眠
喜趣必臻尤佇望
勝遊爭倦更遷延
早荷葉底蹲鴟伏
椶樹梢頭亂蝶穿
醯發牢盆渾棄鹵
鐵資園法免釵鈿
豐饒物態寧殊越
美麗姝姬酷類燕
西海號雄彰傳紀
南康辭健積銘鐫
良工手技高容學
妙隱丹方秘不傳
倚劒靈闕凌絕頂
夢刀孤壘削危巔
金華巷陌遺三品

石鏡伽藍露一拳信落荊州隨鼓柶檢頌芝闕聽搖鞭
若量內地寒暄異且在遐陬水陸全渝舞舊云傳樂府
巴談誰曰繫言詮九苞綰就佳人髻三閨裝成子弟韞
欲辨坤維尋地理纔臨益部認郊廛文翁室暗封苔蘚
葛亮祠荒享豆籩貨出軍儲推賑濟轉行交子頌輕便
氣蒸藹藹根鬚潤日罩梗枏樹影圓藥市風光蟲蟄外
花潭遨樂鴟鳴前聚源待擬求臬氏貯怨那能雪杜鵑
衆植森榮還翁蔚夾流湍迅迴潺湲鮮明機杼知無算

細碎錐刀不啻千合伴鵝髮齊窈窕對陪霓袖競翩翾
五門冷映岷峨雪千里爰疏灌壩泉茂盛八弦宜得最
膏腴十道北俱偏袁滋不到生無分段相重來宿有緣
款名相如登兔苑驟遷太白步花甌歲稔草木時為瑞
奇秀江山代產賢曉後細風紅灼灼夜中微雨碧芊芊
錦亭焰燭明歌障繡閣香氍毹煖熨氎寶塔徘徊停隼旟
觀街雜沓擁輜輶醪醕引架家家郁躑躅攀條處處妍
重愛魯儒提德柄威降曹將董戎旃歡謠少負實人勇

長講多經楚客禪似簇綺羅偏煥耀如流車馬信喧聞
揅機顯綽名堪錄題柱芬芳事莫捐李特鋒錯徒恃險
張儀規畫自持顛鷹揚器業成悠久烏合奸雄敗轉旋
漫向鼎分澄霸道却當龜化驗都塵強貪楚滅悲傾轍
廣洽堯詢喜慕羶側弁猖狂拋玉墜歸鞍酩酊墜金鈿
氛埃屏息雲常覆稼穡繁滋澤靡愆睿聖宵衣垂迺睠
貴臣馳日每傳宣石牛邁路加歆饗江濱隆區助潔蠲
避暑亭臺珍簟設縱閒池沼釣絲牽遮蠻帶礪長能固

捍蜀金湯遠益堅何武甲科曾繼踵嚴真十北罕差肩
儲書競甲諸家集博識咸修百氏箋紙碓暮春臨岸潄
瓜樽春注截河壩華嚴像閣涼堪愛淨衆松溪僻可憐
學射崔嵬橫罨靄放生寬廣媚漪漣蘇庭嫩筍青簦簪
風檻新荷綠扇扇守戍貔貅千萬騎采葑簪筍兩三員
清江瀉勢方流巽大面盤形正壓乾電掃谷風藏虎嘯
雷暝宮樹灑龍涎卻占逃應星舒彩樂喚端聆火撲燃
令範式驅民缺缺咨謀疇倚道平平性寒甘蔗孫偷齧

體膩芭蕉蠹莫沿誌讀備興重掩卷史看唐幸懶終篇
雕盤姹女呈酥作水巷癡童颺紙鳶初下鹿頭迷郭柱
暫來屏浦誤伊瀾變秦言語生皆會戀土情懷死不悛
結廬斧斤宗簡易入神丹護厲精專柳隄夜月朱簾捲
花市春風繡幕褰十縣版圖分戶籍一城牌肆係民編
受辛滋味饒薑蒜劇饌盤飧足鮪鱸月季昌霜秋肯挫
荔枝衝瘴夏宜然幾番藪菁鳴虛籟是箇園林噪懶蟬
動采時先養育菁英屆候別陶甄地丁葉嫩和嵐採天

蓼芽新入粉煎平代啓聞聞繼炭監軍憑軾見劉焉
蘭馥裊幽蹊畔菱芡交鋪曲島邊繪網晚晴誇蹴鞠
畫繩寒食戲鞦韆氤氲紫霧濛都邑縹渺彤霞聚
倭佗螭伏自然銷劒戟螻蛄幾度起戈鋌宦遊止
歎音塵闕鄉飲何驚歲月遄靈壽桃枝奇共結金
砂銀鑠貴相聯埋輪昔按均輸命叱馭今分太守
權徒為行春飛皂蓋詎能許國報青錢政經旋考
尤多僻民瘼深求尚未痊雖愧袴襦非叔度且期
毫墨有馮沿僊遵廉察思從訓克

謹操脩敢好畋南市醉過攢幟隊西樓歡坐列瓊筵煩
囂謹畏傷淳厚慧黠周防近巧譎重祿省心宜致寇薄
材莊貌若臨淵扶危頗異巢居幕勸善還同矢在弦叨
莅一麾康遠俗等閒光景又三年

成都

宋祁

風物繁雄古奧區十年僂父巧論都雲藏海客星間石
成都有一石人傳嚴君平花識文君酒處壚兩劒作關
所辨星石今在嚴真觀

屏對繞二江聯派練平鋪此時全盛超西漢還有淵雲

杼頌無

成都行

陸游

倚錦瑟擊玉壺吳中狂士游成都
成都海棠十萬株繁華盛麗天下無
青絲金絡白雪駒日斜馳遣迎名姝
脂褪盡見玉膚綠鬟半脫嬌不梳
吳綾便面對客書斜行小字密復疎
墨君秀潤腴不枯風枝雨葉蕭蕭殊月
浸羅襪清夜徂滿身花影醉索扶東來
此歡墮空虛坐悲新霜點鬢鬚易求合
浦十斛珠難覓錦江雙鯉魚

夢至成都悵然有作 二首

前人

春風小陌錦城西翠箔珠簾客意迷
下盡牙籌閒縱博刻殘畫燭喜分題
紫氍毹暖帳中醉紅叱撥驕花外嘶
孤夢淒涼身萬里令人憎殺五更鷄

宦途元不羨飛騰錦里豪華壓五陵
紅袖引行遊玉局華燈圍坐醉金繩
階前汗血洮河馬架上霜毛海國鷹
世事轉頭誰料得一官南去冷如冰

雪中懷成都

前人

憶在西州遇雪時
繡筵處處百花圍
烏絲闌展新詩就
油壁車迎小獵歸
感事鏡鸞悲獨舞
寄書箏雁恨慵飛
愁多自是難成醉
不為天寒酒力微

成都書事

前人

劒南山水盡清暉
濯錦江邊天下稀
煙柳不遮樓閣斷
風花時逐馬頭飛
芰羹筍似稽山美
斫鱸魚如笠澤肥
客報城西有園賣
老夫白首欲忘歸

涪州

前人

古壘西偏曉繫舟倚闌搔首思悠悠欲營丹竈竟無地
不見荔枝空遠遊官道近江多亂石人家避水半危樓
使君不用勤留客瘴雨蠻烟我欲愁

涪州十韻

馬提幹

地踞襟喉重城依雉堞堅東漸鄰楚分南望帶夷邊舟
楫三川會封疆五郡連人煙繁峽內風物冠江前溪自
吳公邑園由妃子傳許雄山共峻馬援壩相聯灘急羣
瀦沸崖高落馬懸石魚占歲稔鐵櫃驗晴天地暖冬無

雪人貧歲不綿巖標山谷子觀塑爾朱僊

涪州

宋翰

錦繡洲猶在熊羆夢已無文風齊西蜀仙洞接三都白石從天設青崖見地圖荔支妃子國不復曩時輸

彭山縣君居

文同

公館靜寥寥園亭景物饒溪光明短竹樹影蔭危譙山鳥忽雙下溪魚時一跳主人王事簡文酒日逍遙

廣安

何志熙


欲說實城好先誇方物妍金羹收稻後紅腊落梅前照
坐梨偏紫堆盤荔更鮮雪藤尤異產應不數花牋

蜀國弦

明劉基

胡笳拍斷玄冰結湘靈曲終斑竹裂為君更奏蜀國弦
一彈一聲飛上天蜀國周遭五千里峨眉迢迢連玉壘
岷嶓出水作大江地表天浮戒南紀舒為五色朝霞暉
慘為虎豹號陰霏翕為千嶂雲雨入噓為百里雷霆飛
白鹽雪消春水滿谷鳥相呼錦城暖巴姬倚歌漢女和

楊柳壓橋花纂纂銅梁翠氣通青蛉碧鷄啼落天上星
山都號風寡鵲泣杜鵑鳴咽愁幽冥商悲語怒聽未了
窮猿三聲巫峽曉瞿唐浪波翻九淵倒瀉流泉喧木杪
樓頭仲宣羈旅客故鄉渺渺音塵隔含悽更聽蜀國音
不待天明頭盡白



全蜀藝文志卷五

欽定四庫全書

集部

全蜀藝文志卷六

八至

詳校官內閣中書_臣李采

侍讀_臣孫球覆勘

總校官進士_臣繆琪

校對官中書_臣李荃

謄錄監生_臣王焜

欽定四庫全書

全蜀藝文志卷六

明 周復俊 編

詩

城郭

樓閣

奉和嚴中丞西城晚眺

唐杜甫

汲黯匡君切
廉頗出將頻
直辭才不世
雄畧動如神
政簡移風速
詩清立意新
層城臨暇景
絕域望餘春
旗尾蛟龍會
樓頭燕雀馴
地平江動蜀
天濶樹浮秦
帝念深

金少卿詩集卷六
分閫軍須遠算緋花羅封峽蝶瑞錦送麒麟辭第輪高
義觀圖憶古人征南多興緒事業暗相親

上白帝城

前人

城峻隨天壁樓高更女牆江流思夏后風至憶襄王老
去聞悲角人扶報夕陽公孫初恃險躍馬意何長

蜀城春望

崔塗

天涯憔悴身一望一沾巾在處有芳草滿城無故人懷
材皆得路失計自傷春清鏡不堪照鬢毛愁更新

覽蜀宮故城作

宋祁

國破江山老人亡岸谷摧鴛飛今日瓦鹿聚向時臺故
苑猶霏雪荒池但劫灰潁遺糊處壤闔記數殘枚恨月
窺林下悲風覓隴來依城孤獨速失屐驚裴回廢社纔
存樹陰垣自上苔有情惟杜宇長為故王哀

觀古魚鳧城

在溫江縣北十五里有小院

孫松壽

野寺依脩竹魚鳧迹半存高城歸野壠故國靄荒村古
意憑誰問行人謾苦論眼前興廢事煙水又黃昏

白帝城

宋肇

江雨霏霏白帝城
秋草未枯春草生
古來戰壘如雲橫
萬里瞿塘斷人行
至今三峽路崢嶸
時清不見更屯兵
荒涼廢堞沒春耕
但見牛羊日西平

白帝城

曾慥

白帝城頭路逶迤
一徑遙高堂臨峽口
瀑水沒山腰隔岸
魚施網橫江鐵貫橋
神妃翻覆手願賜雨連宵

白帝城

陳謙

漢家郡國奄方輿天覆尊臨北斗居躍馬建旌何草草
縮蛙緣井共區區千年雲雨忘遺堞萬里山河鎮卧廬
悽惻渭營生雨急永安宮址最先墟

樓閣

登成都白兔樓

晉張載

重城結曲阿飛宇起層樓累棟出雲表嶢嶻臨太虛高
軒啓朱扉迴望暢八隅西瞻岷山嶺嵯峨我似荆平蹲鴟
蔽地生原隰殖嘉蔬雖遇堯湯世民食恒有餘鬱鬱少

城中岌岌百族居街術紛綺錯高甍夾長衢借問揚子
舍想見長卿廬程卓累千金驕奢擬五侯門有連騎客
翠帶腰吳鉤鼎食隨時進百和妙且殊披林採秋橘臨
江釣春魚黑子過龍醢果饌踰蟹蜃芳茶冠六清溢味
播九區人生苟安樂茲土聊可娛

登錦城散花樓

唐李白

日照錦城頭朝光散花樓金窻夾繡戶珠箔懸瓊鉤飛
梯綠雲中極目散我憂

一作愁

暮雨向三峽春江繞雙流

今來一登望如上九天遊

白帝城最高樓

杜甫

城尖徑異旌旆愁獨立縹緲之飛樓
峽坼雲霾龍虎睡江清日抱龜鼉遊
扶桑西枝封斷石弱水東影隨長流
杖藜歎世者誰子泣血迸空迴白頭

南充韓士英曰杜子美登白帝最高樓詩云
峽坼雲霾龍虎卧江清日抱龜鼉遊此乃登
高臨深形容疑似之狀耳雲霾坼峽山木蟠

罕有似龍虎之卧日抱清江灘石波盪有若
鼃鼃之遊余因悟舊註之非其云雲氣陰黯
龍虎所伏日光圓抱鼃鼃出曝真以為四物
矣即以杜證杜如江光隱映鼃鼃窟石勢參
差烏鵲橋同一句法同一解也蘓子赤壁賦
云踞虎豹登虬龍攀棲鶻之危巢俯馮夷之
幽宮亦是此意豈真有烏鵲鼃鼃虬龍虎豹
哉

晚夏登張儀樓呈院中諸公

段文昌

重樓牕戶開四望劒煙埃遠岫林端出清波城下迴乍
疑蟬韻促稍覺雪風來併起鄉關思銷憂在酒盃

同前

姚向

秦相架羣材登臨契上台槎從銀漢落江自雪山來灑
曲親流火凌風洽小杯帝鄉如在目欲下盡徘徊

同前

溫會

危軒重疊開訪古上徘徊有舌嗟秦策飛樑認楚材雲

金少卿八言
卷六
霄隨鳳到物象為詩來欲和闕山意已歌調更哀

同前

楊汝士

從公城上來秋近絕纖埃樓古秦規在江分蜀望開
遠山標宿雪木席本寒灰陪賞今為忝臨歡敢訴杯

同前

李敬伯

層屋架城隈賓筵此日開文鋒摧八韻星分應三台
望雪煩襟釋當歡遠思來披雲霄漢近暫覺出塵埃

同前

姚康

登覽值晴開詩從野思來蜀川新草木秦日舊樓臺池
影搖中座山光接上台近秋宜晚景極目斷浮埃

散花樓

張祜

錦江城外錦江頭回望秦川上軫憂正值血魂來夢裏
杜鵑聲在散花樓

越王樓詩

并序

宋樊紹述

綿之城帝獨猷掀明威彌石峭馳涪瀨左淩淩紅稜
簪天地送行矣壬且掬跼踣千西北蟠紅顏青越王

正欲為樓重軒疊飛門明窓蒙傘蹇蹇予始登謂日
月昏曉可窺其背雷電合風雲邁霜辛露酸星辰介
行神鬼變化草木頽繡髻御簑艾皆可察極縈視其
江帶又極視其土崗斷暴遠近山嶽若闕之東皇天
原開見荆山我可黃河矚然為曲直淚雨落不可掩
因口其心曰無害古其目果星星過歸尚悲不能解
重為詩以釋益不可顧謂郡中諸君能無有意綴以
華艷其念蓄云

危樓倚天門如闔星辰宮
棟薄龍虎怪洄洄繞雷風
徂秋試登臨大靄屯喬松
不見西北路老懷益凋窮
石瀨薄濺濺土山杳窮窮
昔人愴為逝所適醜顏紅
今我茲之來猶校成歲功
輟田植科畝游圃歌芳叢
地財無取厚人室安取豐
既乏富庶能千萬慚文翁

北樓

宋祁

少城西北之高樓此地蒼
茫天意秋驚風白日忽已
晚落葉長年相與愁極塞
雲物自慘澹趨林鳥雀時
啁啾

纓上朔塵久不洗安得手弄滄江流

西樓夕坐

前人

炎氛隨日入岑寂坐遙惟倦驚昏投浦驚蟬夜去枝桂
華魚月破槎影帶星移珍重窻風好義人即此時

陪孫之翰大博登成都樓

張俞

齷齪古之人傷心廣陵廢遂絃蕪城歌半夜一揮涕蕙
紉隨草衰藻黼歸塵翳魂石歛丘封歌堂從水逝薰光
杳沈滅吞恨徒千歲我懷吳蜀國旣亂若符契目覽臺

殷墟心感君王世千戈日馳逐狼虎爭吞噬山河實天
塹城闕巍地肺霸力不久炎倏忽如焚薶空餘萬雉城
岌倚寒雲際麋鹿玩草陰狐狸棲棘衛江漢含嗚咽岷
峨抱迢遞荒村煙火遙落日寒風厲因知市朝人自古
悲興替

散花樓

喻汝礪

濯錦江邊莎草濃散花樓畔天芙蓉蜀山疊疊脩門遠

誰把丹心問李鄘

唐討淮蔡李鄘籍帑藏以獻由是諸道皆助軍費自鄘倡之

樓上醉歌

陸游

我游四方不得意
陽狂施藥成都市
大瓢滿貯隨所求
聊為疲民起憔悴
瓢空夜靜上高樓
買酒捲簾邀月醉
醉中拂劒光射月
往往悲歌獨流涕
刻却君山湘水平
斫却桂樹月更明
丈夫有志苦難成
修名未立華髮生

芳華樓賞梅

前人

素娥竊藥不奔月
化作江梅寄幽絕
天工丹粉不敢施
雪洗風吹見真色
出籬藏塢香細細
臨水隔煙情脉脉

一春花信二十四縱有此香無此格放翁年來百事慵
惟見梅花愁欲破金壺列置春滿屋寶髻斜簪光照坐
百榼淋漓玉釀飛萬人辟易銀鞍過不惟豪橫壓清臞
聊為詩人洗寒餓

健為江樓

范成大

河邊堵立看歸篷三老開頭暮欲東漲水稠灘連峽內
淺山浮石似湘中無人驛路榛榛草有客江樓浩浩風
種落塵消少公事賸裁新語寄詩筒

縣令師永錫
同年能詩

西樓獨上

前人

竹日駐微暑松風生早秋閒尋來處路獨倚靜中樓老
景驅雙轂鄉心挽萬牛相隨木上坐脚底亦雲浮

西樓秋晚

前人

樓前處處長秋苔俛仰璫杓又欲回殘暑已隨梁燕去
小春應為海棠來客愁天遠詩無託吏案山橫睡有媒
晴日滿窓鳬鶩散已童來按鴨爐灰

冬至日銅壺閣落成

前人

走遍人間行路難異鄉風物雜悲歡三年北戶梅邊暖
萬里西樓雪外寒已辦鬢霜供歲籥仍拚髀肉了征鞍
故園雲物知何似試上東樓直北看

萬景樓

在漢嘉城中山上登覽勝絕殆冠此州
予令畫工作圖以歸山谷來游時但有

安樂園未
有此樓也

前人

左披九頂雲右送大峨月殘山剩水不知數一一當樓
供勝絕玻瓈濯錦遙相通指揮大渡來朝宗川靈胥命
各東去我亦順流呼短篷詩無傑語慚風物賴有丹青

傳小筆仍添詩客倚欄看令與山川相映發龍彎歸路
遶烏尤棟雲簾雨邀人留若為喚得涪翁起題作西南
第一樓

別後寄題漢嘉月榭

陸務觀所作同年謂王子
蒼萬景嘉州酒名湖亭明

月湖也在州治前方作旗亭月榭正直大峨取太
白峨眉山月之語以名傍有一岩景趣尤佳子

蒼欲作
樓未果

前人

隱吏詩情卜築幽同年惜別勸淹留試傾萬景湖亭酒
來看半輪江月秋川路雖長猶共此夜船空載且歸休

碧巖勝處頻回首好事誰能更小樓

制勝樓

王延禧

夔子城新築長江便作壕欲兼諸面敵故起北樓高即
舊基仍峻因時力不勞青天纔咫尺翠壁似周遭近照
東西漲遙分上下牢百蠻歸指掌三峽見秋毫帝道方

無外皇威到不毛三鈎閑夜鎖

圖經三鈎鎮置鎖水即今舊州是也

八陣

縱春遨

夔民每歲人日遊八陣磧

守土慙非稱提兵亦謬叨經營皆

使指備豫本戎韜功乏為山助名加制勝褒登臨欲吟

咤深愧杜陵豪

制勝樓

李濤

畫省容臺記並遊相思相望幾登樓路長久歎音塵絕
事變還驚歲月流合侍鈞天終雅奏却穿巴峽看橫舟
欲酬嘉惠須新語老覺枯腸不奈搜

登制勝樓次韻

閻蒼舒

百牢關下古夔州坐鎮休餘只倚樓赤甲白鹽齊意氣
葛巾羽扇獨風流夜聞警柝拋金鎖春樂熙臺醉玉舟

化國舒長公事少眼中萬象固神搜

白雲樓

程之才

驚熊城郭遠蒼崖萬疊煙嵐亦壯哉平地窺觐心未悵
重樓徙倚眼初開披襟風月爭新入剖月江山破迴來
日落三我知處所雲浮雙闕欲崔嵬胡牀不愧庾公興
奕簞還思杜老才更待攜衾盡清景夜深欄檻逼昭回

仁壽寺閣

程公闕

半天鐘鼓宴崢嶸早晚晴陰景旋生湖暖水香春載酒

月寒雲迴夜間笙金鼇破海頭爭並玉鷺排煙陣自橫
我是蓬萊東道主倚欄先占日初明

合州望黥樓

義光

江上望黥樓望中煙靄浮微涼生戶牖新雨過汀洲遠
岫千重疊清波萬里流此時何限興回首寄羣鷗

彭州南樓

文同

百尺壓城端飛簷欲上搏湖光搖埤堦山影轉欄干秀
野含春構喬林擁暮寒回頭大岷雪千仞玉巔屹

歸雲閣

明安磐

山腰飛鳥回樹杪泉聲落
尋幽醉不歸更上歸雲閣

全蜀藝文志卷六

欽定四庫全書

全蜀藝文志卷七

明 周復俊 編

詩

宮苑

宣華苑宮詞

偽蜀王衍

輝輝赫赫浮玉雲宣華池上月華春月華如水浸宮殿
有酒不醉真癡人

玉雲王灼碧鷄漫志作五雲

宮詞一百首

花蕊夫人

五雲樓閣鳳城間花

一作草

木長新日月間二十六宮連

內苑太平天子住崑山

會真廣殿約宮牆樓閣相扶倚太陽淨梵玉塔橫水岼
御爐香氣撲龍牀

龍池九曲遠相通楊柳絲牽兩岼風長似江南好風景
畫船來往碧波中

東內斜將紫氣通龍池鳳苑夾城中曉鐘聲斷嚴粧罷
院院紗牕海日紅

殿名新立號重光島上亭臺盡改張但是人行從一作

幸處黃金閣子鎖牙牀

安排諸院接行廊水檻周回十里强青錦地衣紅線一作

頌毯畫鋪蘭麝一作鬱金香

龍腦

夾城門與內門通朝罷巡遊到苑中每日日高祇候處

滿堤紅豔立春風

厨船進食簇時新侍坐一作無非列近臣日午殿頭宣

索膾隔簾一作催喚打魚人

立春日進內園花紅蕊輕輕嫩淺霞跪到玉堦猶帶露

一時分

一作宣

賜與宮娃

三面宮城盡夾牆苑中池水白茫茫一作直從獅子門

前入旋見亭臺繞岸傍

離宮別院遶宮城金版輕敲合鳳笙每夜一作夜月明花

樹底傍池長有按歌聲

旋移紅樹斲青苔宣使龍池更鑿開展得綵波寬似海

水心樓殿勝蓬萊

御製新翻曲子成六宮纔唱未知名盡將感策來抄譜
先按君王玉笛聲

修儀承寵住龍池掃地焚香日午時等候大家來院裏

看教鸚鵡念新宮

一作詩 一作詞

六宮官職總新除宮女安排入畫圖二十四司分六局
御前相見錯相呼

才人出入每相

一作參

隨筆硯將行遶曲池能向綵牋書

大字忽防御製寫新詩

春風一面曉粧成
偷折花枝傍水行
却被內監一作遙

覷見故將紅豆打黃鶯

小毬場近曲池頭
宣喚勲臣試打毬
先向畫廊一作樓排

御幄管絃聲動立浮油

梨園弟子簇池頭
小樂攜來候宴遊
試一作旋炙銀一作紅

笙先按拍海棠花
下合梁州

殿前排宴賞花開
宮女侵晨探幾回
斜望苑門遙舉袖

傳聲先一作宣喚近臣來

供奉頭籌不敢爭上名

一作棚

專喚近臣名內人酌酒爭

一作繞

宣賜馬上齊呼萬歲聲

殿前宮女總纖腰初學乘騎怯又嬌上得馬來纔似走

幾回拋鞚抱

一作把

鞍橋

自教宮娥學打毬玉鞍初跨柳腰柔上棚知是官家認
遍遍長贏第一籌

翔鸞閣外夕陽天樹影花光遠接連望見內家來往處

水門斜過罨

一作畫

樓船

內人追逐採蓮時驚起鳬鷗兩岼飛蘭棹把來齊拍水
並船相鬪濕羅衣

新秋女伴各相逢
畫船飛別浦中
旋折荷花伴歌舞
夕陽斜照滿衣紅

少年相逐採蓮回
羅帽羅衣巧製裁
每到岸頭長拍水
競提纖手出船來

早春楊柳引長條
倚岼緣牆一面高

牆一作堤

稱與畫船牽

錦纜暖風搓出綵絲絛

婕妤生長帝王家常近龍顏
逐翠華楊柳岼長春日暮
傍江行困倚桃花

月頭支給買花錢滿殿宮人
近數千遇著唱名多不語

含羞走

一作急

過御床前

數千一作二千

太虛高閣凌波殿背傍

一作倚

宮牆面枕池諸院各分娘

子位羊車到處不教知

寒食清明小殿旁綵樓雙夾鬪雞場
內人對御分明看

先睹紅羅十擔床

熙寧五年臣安國奉詔定蜀楚秦氏三家
所獻書可入三館者令令史李希顏料理
之其書多剝脫得一敝紙所書花蕊夫人
詩共三十二首乃夫人親筆而辭甚奇與
王建宮詞無異建自唐至今誦者不絕口
而此獨遺棄不見取前受詔定三家書者
又斥去之甚為可惜也臣謹令令史郭祥
繕寫入三館而歸日誦數篇于丞相安石

與中書語及此而王珪馮京願傳其本
於是盛行於時夫人偽蜀孟昶侍人事
具國史臣安國謹題

逸詩

水車踏水上宮城寢殿簷頭滴滴鳴助得聖人高枕興
夜深長作遠灘聲

平頭船子小龍床多少神仙立御傍旋刺篙竿令過岼
滿池春水蘸紅粧

苑東天子愛巡遊
柳岼花堤枕碧流
新教內人工射鴨
長將弓箭遶池頭

羅衫玉帶最風流
斜揷銀篦慢裹頭
閒向殿前騎御馬
掉鞭橫過小紅樓

沉香亭子傍池斜
夏日巡遊歇翠華
簾畔玉盆盛淨水
內人手裏割銀瓜

薄羅衫子透肌膚
夏日初長板閣虛
獨自憑欄無一事
水風涼處讀文書

金畫香臺出露盤
黃龍彫刻遶朱欄
焚修每遇三元日
天子親簪白玉冠

六宮一例羅冠子
新樣交鐫白玉花
欲試淡粧兼道服
面前宣與唾盂家

三月櫻桃乍熟時
內人相引看紅枝
回頭索取黃金彈
遶樹藏身打雀兒

小小宮娥到內園
未梳雲鬢臉如蓮
自從配與夫人後
不使尋花亂入船

錦城上起凝煙閣擁殿遮樓一面高認得聖人一作遙望見碧欄杆映赭黃袍

大臣承寵賜新莊梔子園東柳岸旁每日聖恩親幸到板橋頭是讀書堂

東院開府輔政餘暇每到苑中聖人特賜新莊以修遊宴之所

舞頭皆著畫羅衣唱得新翻御製詞每日內廷聞教隊樂聲飛出到龍池

春早尋花入內園競傳宣旨欲黃昏明朝隨駕遊蠡市暗使羶車就苑門

半夜船搖載內家水門紅蠟一行斜聖人正在宮中飲
宣使池頭旋折花

春日龍池小宴開岼邊亭子號流杯沉檀刻作神仙女
對捧金尊水上來

慢梳鬟髻著輕紅春早爭求芍藥叢近日承恩移住處
夾城裏面占新宮

別色宮司御輦家黃衫束帶臉如花深宮內苑忝承慣
常從金輿到日斜

日高房裏學圍碁等候官家未出時常為

一作為賭

金錢爭

路數專憂女伴怪來遲

樗蒲冷淡學投壺箭倚腰身約畫圖畫對君王稱妙手
一人來射一人輸

慢揎羅袖指纖纖學釣池魚傍水邊忍冷不禁還自去

釣竿長

一作常

被別人拈

宣徽院約池南畔

一作岍

粉壁紅窓畫不成總是一人行

幸處徹宵聞奏管絃聲

丹霞亭浸池心冷曲沼門含水脚清傍岬鴛鴦皆著對
時時出向淺沙行

楊柳陰中引御溝碧梧桐樹擁朱樓金陵城共滕王閣
畫向丹青也含羞

曉來隨駕上城遊行到東西百尺樓回望苑中花柳色
綠陰紅豔滿池頭

牡丹移向苑中栽盡是藩方進入來未到末春綠地暖
數般顏色一時開

明朝臘日官家出隨駕先須點內人回鶻衣裝回鶻馬
就中偏稱小腰身

盤鳳鞍韉

一作鞍
韉盤龍

開色裝黃金腰胯

一作
壓胯

紫游韉自從

揀得真龍種別置東頭小馬坊

翠輦每隨城畔出內人相次簇池邊嫩荷花裏搖船去
一陣香風送水仙

高燒紅蠟

一作
燭

點銀燈秋晚花池景色澄今夜聖人新

殿宿後宮相近覓祇承

苑中排比宴秋宵絃管掙撻各自調日晚閣門傳聖旨
明朝盡放紫宸朝

夜深飲散月初斜無限宮嬪亂插花近侍婕妤先過水
遙聞隔岸喚船家

宮城小小豔紅粧唱得歌聲遶畫梁緣是太妃新進入
座前頻賜小

一作綵羅箱

池心小樣釣魚船入翫偏宜向晚天挂得綵帆教便放
急風吹過水門邊

傍池居住有漁家
收網搖船到淺沙
預進活魚供日料
滿筐跳躍白銀花

秋晚

一作曉

紅粧傍水行
競將衣袖撲蜻蜓
回頭瞥見宮

中喚幾度藏身入畫屏

御溝春水碧於天
宮女尋花入內園
汗濕紅粧行漸困
岸頭相喚洗花鈿

昭儀侍宴足精神
玉燭抽看記飲巡
倚賴識書為錄事
燈前時復錯瞞人

後宮阿監裹羅巾出入經過苑囿頻承奉聖顏憂誤失
就中長怕內夫人

管絃聲急滿龍池宮女藏鉤夜宴時好是聖人親捉得
便將濃墨掃雙眉

密室紅泥地火爐內人冬日晚相呼今宵駕幸池頭宿
排比椒房得暖無

三清臺近苑牆東樓檻層層映水紅盡日綺羅人度曲
管絃聲在半天中

高亭百尺立春

一作當

風引得君王到此中床上翠屏開

六扇折枝花綻

一作檻花初綻

牡丹紅

內人新

一作承

寵賜新房紅粉泥窗遶畫廊種得海柑才

結子乞求自進與君王

翡翠簾前日影斜御溝春水浸成霞侍臣向晚隨天步

共看池頭滿樹花

金碧闌干倚畔邊捲簾初聽一聲蟬殿頭日午搖紈扇

宮女爭來玉座前

嫩荷香撲釣魚亭水面文魚作隊行宮女競來池畔立

一作看

傍簾呼喚勿高聲

新翻酒令著詞章侍宴初開意却忙宣使近臣傳賜本
總教諸院遍抄將

畫船花舫總新粧進入池心近島傍松柏鏤窓楠木版
暖風吹過四圍香

西毬場裏打毬回御宴先從苑內開宣索教坊諸伎樂
傍池催喚入船來

年初十五最風流新賜雲鬟使上頭按罷霓裳歸院裏
畫樓雲閣總重修

春天睡起曉粧成隨侍君王觸處行畫得自家梳洗樣
相憑女伴把來呈

寢殿門前曉色開紅泥藥樹間花栽君王未起翠簾捲

宮女更番

一作又
發宮人

上直來

海棠花發盛春天游賞無時列御筵遶畔結成紅錦帳
暖枝低拂畫樓船

晚日宮人外按回自牽驄馬出城隈御前接得高叉手

射得山雞喜

一作且

進來

朱雀

一作蠅

門高苑外開毬場空濶淨

一作沒

塵埃預排白

兔兼蒼狗等候君王按鵲來

會仙觀裏玉清壇新點宮人作女冠每度駕來羞不出
羽衣初著怕人看

老大初教作道人鹿皮冠子淡黃裙後宮歌舞全拋擲
每日焚香事老君

法雲寺裏中元節又是官家降誕辰滿殿香花爭供養
內園先占得鋪陳

酒庫新修近水傍撥醅初熟五雲漿殿前供御頻宣索
搜一作進入花間一陣香

白藤籠插白銀花閣子門開一作當寢殿斜近被宮中知
了事每來隨駕使煎茶

金章紫綬選西班每每東頭近聖顏材藝足當恩寵別
只堪供奉一場閒

安排竹柵與巴籬養得新生鶻鵒兒宣受內家教一作專

餵飼花毛問著總皆知

內人深夜學迷藏遍遶花叢水岼傍乘興忽一作或來山

洞裏大家尋覓一時忙

小院珠簾著地垂院中排比不能一作相知羨他鸚鵡能

言語牕裏偷教鸚鵡兒

島樹高低約浪痕島中斜日已一作欲黃昏樹頭未刻雙

飛鶴颺起晴空映水門

今補入宮詞三首

小雨霏微潤綠苔
石闌紅杏傍池開
一枝挿向金餅裏
捧進君王玉殿來

錦鱗躍水出浮萍
荇草牽風翠帶橫
恰似金梭攬碧沼
好題幽恨寫閨情

鴛鴦瓦上忽然聲
晝寢宮娥夢裏驚
元是吾王金彈子

海棠窠下打流鶯

鴛鴦瓦上一首趙與時賓退錄云
不知名李珣瓊瑶集以為王衍宮

人李玉

籌作

晚步宣華舊苑

宋范成大

喬木如山廢苑西
古溝臨水靜鳴池
吏兵悉率更番後
樓閣崔嵬欲暝時
有露冷螢猶照草
無風驚鵲自還枝
歸來更了程書債
目眇昏花燭穗垂

全蜀藝文志卷七